



Il comite d'organisaziun dil secund Surselva Street Food Festival a Rueun. Da seniester Sandro Derungs, Ladina Dermond, Pia Tschuor, Andri Carigiet e Mirco Dermond.

FOTOS H. HUONDER

Bia e bien da magliar per mintga gust

La giuventetgna da Rueun ha organisau per la secunda ga il Surselva Street Food Festival

DA HANS HUONDER / ANR

■ Per la secunda ga ha l'Uniu da giuventetgna Rueun arranschau la sonda sera il Surselva Street Food Festival. Malgrad l'aura plitost bruta e per part era plievgia, han ils organisaturs saviu beneventar dabia glied el vitg. Plirs onns ha l'uniu da giuventetgna organisau ina «After Winter Party». Quella ha lu contonschiu ina tala dimensiun che biaras commembras e commembers han giu lavur tochen las ureglias ed ein buca pli stai prompts da cuntinuar cun quella. Essend ch'il ligiom ei fetg gronds enteifer l'uniu, han ins tonaton vuliu porscher enzatgei el vitg ed ei lu sedecidius per in Street Food Festival. «Nus havein vuliu organisar enzatgei pli surveivel ed en ina rama supportabla per tuccont la lavur», di la conorganisatura Pia Tschuor.

Per la secunda ga

Il Surselva Street Food Festival ha giu ligugl onn vargau per l'emprema ga ed il success ei staus talmein sorprendents che l'uniu da giuventetgna ha decidiu da cuntinuar. Uonn ein entginas autra persunas stadas responsablas per l'organisaziun, mo tonaton ein era quella ga ver 30 commembras e commembers segidai cun tutta forza. Sin fundament dallas experientschas fatgas igl onn vargau ha ei dau entginas midadas uonn. «Nus havein decidiu da porscher ina tenda cun plaz per rodund 120 persunas e l'aura ha musau che quei ei stau la dretga decisiun. Lu havein nus denton era purschiu divertiment pils affons en fuorma d'in giug cun



In interessant stan – quel da Sigis Burger.

andinas», di Pia Tschuor. Per la lavur administrativa da quei festival ei in «flexcar» staus a disposiziun all'uniu. Danovamein ei il festival vegnius arranschaus sila via cantunala atras il vitg e persunter ha ei duvrau ina lubientscha speciala. Rueun ei ella situaziun confortabla ch'igl ei pusseivel da sviar quei tschancun da via.

Sustegn da pliras varts

El center dil festival ein ils 12 stans stai. Sin quels ei vegniu purschiu ualti bein tut quei ch'ins ha vuliu per cuntentar egl e magun. Buca mo spisas tradiziunalas indigenas sco capuns ein vegni offeri, mobein era specialitads internaziunalas ch'ins ha schiglioc buca la caschun da gu-

der. Era uonn ha il festival saviu vegnir organisaus sulettamein cun sustegn generus da pliras varts. «Senza ils biars sponsurs e donaturs – pigns e gronds – fuss in tal festival buca pusseivel», constatescha Pia Tschuor. Schebein ei vegn a dar in tierz Surselva Street Food Festival vegn l'Uniu da giuventetgna Rueun a decider a sia radunonza generala il november vegnent. L'uniu ei dil reminent buca mo ina ferma unitad ell'organisaziun d'arranchaments publics. Era intern porscha ella a commembras e commembers differentas pusseivladads da sentupada. Sper la tgira dalla tradiziun da Sontgaclau e dalla parada el vitg organischa ella era in di da skis ed ina ga ni l'autra in viadi.



La tierza classa dil scalem superior da Rueun ei medemamein separticipada al festival cun in stan.



Era il secund Food Festival a Rueun ei buca sesplegus senza plievgia.



In(a) e scadin(a) ha fatg tut il pusseivel per porscher igl optimum alla clientella.



Era da dis empau pli freids e cun plievgia san ins guder in bien glacé.



Buca mo ils affons pigns selegnan dil giug cun las andinas.